

Enver Kadrić, geom.



Nakon duge i teške bolesti, 07.03.2023. godine preminuo je naš dugogodišnji saradnik i kolega Enver Kadrić. Dženaza je obavljena u prisustvu velikog broja rodbine, prijatelja, komšija i kolega, a ukop je izvršen na mjesnom groblju Stari Ilijaš, u neposrednoj blizini mjesta njegovog rođenja.

Enver Kadrić rođen je 03.02.1949. godine u Ilijašu gdje je završio osnovnu školu. Geodetsku srednju tehničku školu u Sarajevu pohađao je u razdoblju od 1965. do 1969. godine, nakon čega je zasnovao radni odnos u Željezari Ilijaš na poslovima u Tehničkom birou, gdje je radio sve do 1992. godine.

Ratno razdoblje od 1992. do 1996. godine provodi kao pripadnik Armije Republike Bosne i Hercegovine. Izbjeglištvo i teško ranjavanje sastavni su dio tog perioda Enverovog života.

Reintegracijom općine Ilijaš zaposlio se u Općini Ilijaš kao geometar u službi za katastar, gdje je i radio sve do penzionisanja.

Sa suprugom Gordanom odhranio je dva sina – Jasmina i Kenana, a za života ostvario se i kao djed troje unučadi.

Kao osoba uvijek je bio tih i skroman. Brojna prijateljstva stekao je kroz bavljenje sportom, a svoju neizmjernu ljubav prema sportu najviše je izražavao kroz nastupe za FK Sloga iz Ilijaša. Pored sporta, Enver je gajio veliku ljubav i prema muzici. Gitara je bila neizostavni dio druženja sa Enverom, a pisanje stihova mu nije bilo strano. Okušao se kao tekstopisac par balada koje su ostale kao vječna uspomena na njegovu skromnost i dobrotu kojom je zračio.

Ilijašanima je "Enki" bio kao zaštitni znak, a druženje s njim pričinjavalo je zadovoljstvo.

Kolegama koji su imali priliku da dio radnog vijeka provedu sa Enverom ostaće u veoma lijepom sjećanju, a njegovo ponašanje kao primjer skromnosti, etike i profesionalizma.

Hvala mu za sve što je učinio.

U ime svih kolegica i kolega iz Općine Ilijaš,

Nizama Mališević